

Per trutgs e pitgognas dals 19-08-2011

Proposta da Norbert Grond

Levada dal sulegl sin il Piz Chavalatsch

Durada ca. 6 uras
Differenza d'atezza ca. 1300 m

Ruta:

Pertge il Piz Chavalatsch? Quai è il Piz il pli a l'ost da la Svizra, e per far ina tura da notg bain adattà, naginas parts privlusas.

Emplenir bain il satgados, cun ina buna marena, da baiver, buns chalzers, ina buna lampa da maun per la notg (zunt adattada è ina glisch LED, dovra pauc batteria), era sche dat chaud ina buna giacca da vent per sin il Piz.

Ins parta ca. las 02.00 uras cun l'auto davent da la val, fin sin il Guad, 1500 m, tar il mussavia prend'ins la senda tras il guaud, betg stippa, fin Tramen 1870 msm. Tar il grip cuntinuescha la senda vers la chamona Plaun Radond, in'emprima pausa ha ins merità qua, tar il proxim mussavia, prend'ins la direcziun Piz Chavalatsch, suenter ca. 1.5 uras arriv'ins sin la Schara 2600 msm. Qua cumenza il di da vegnir clar, sin ina senda stippa arriv'ins suenter 40 minutas sin il Piz.

L'Ortler 3930 msm che stat davant ins, vegn plaunet illuminà dal sulegl, il glatscher cumenza da glischar sco in cristal, in vent ascendent annunzia ils radis dal sulegl sin il Piz.

Cura che l'apparat da fotografias è plain, prend'ins la medema senda fin Era da Jals, là maina il trutg trid vers la senda da Pin Pitschen, ina vista tut speziala, fin la chamona da Pin Grond, davant la chamona chatt'ins il mussavia vers Alp Sielva ed ils bains da Guad.